

# Powšitkowne WOZJEWJENJA

njedźelu, 1. decembra 2024

## Zetkanje samostejacych

Samostejacy ze serbskich wosadow su na swoje lětuše poslednje zetkanje wutoru, 10. decembra, w 14.00 hodź. do Smochčanskeho kubłanišća swjateho Bena přeprošeni. Zajimcy njech so hač do wutory, 3. decembra, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy kaž tež ći, kotřiž njejsu samostejacy, su tohorunja wutrobnje witani. Kóždy njech sej Wosadnik sobu přinjese. Štóž chce wo te wzaty być, njech to prošu zdžěli.

## Na adwentny koncert

Pod hudźbnym nawodom Kathariny Dickopf wuhotuje orchester Budyskeho Serbskeho ludoweho ansambla (SLA) tutu njedźelu, 1. decembra, w 17.00 hodź. adwentny koncert na tamnišej žurli. Zaklinča měrne a do adwenta hodžace so orchestrowe twórby serbskeju komponistow Helmuta Fryče a Jana Rawpa kaž tež smyčkowa serenada E-dur op. 22 Antonína Dvořáka a suite „Nußknacker“ op. 71 Pjotra Čajkowskeho. Zastupne lisćiku dóstanu zajimcy při kasy SLA. Dalše předstajenje je mjez druhim štwórtu adwentnu njedźelu, 22. decembra, w 17.00 hodź. w Radworskim hosćencu „Meja“. Link k zastupnym lisćikam je pod [www.posol.de](http://www.posol.de) podaty.

## Boža mša w Róžeńće tola 8. decembra

Hinak hač tydženja wozjewjene, budu Boža mša na swjedženju Marije bjezhřešneho podjeća w Róžeńčanskej swjatnicy tola druhu adwentnu njedźelu, 8. decembra, a nic nazajtra. Kemše budu w 10.30 hodź. Redakcija Katolskeho Posoła, kotraž prosy wopačne wozjewjenje zamołwić, njebu prawje informowana. Kemšam přizamknu so modlerske hodžiny, kotrež zakónča so z nyšporom w 14.00 hodź.

## Adwentnička

Lětuša adwentnička dekanatneje młodžiny budže druhu adwentnu njedźelu, 8. decembra, w Njebjelčicach. Nyšpor w 14.00 hodź. wobrubu 1. serbska kulturna brigada. Přizamknje so zhromadnu swačina z hrami a paslenjom na farje.

## Spěwny wječork w Jaseńcy na nowym městnje

W Jaseńcy přewjedže so sobotu, 7. decembra, kaž hižo wjele lět na předwječoru druheho adwenta spěwny wječork, tónraz pak w Budarjec bróžni, na dróze do směra Dobrošic, čisło 14. Započatk je po Chróšćanskich wječornych kemšach w 19.45 hodź. Wječork wuhotuja skupinje PoŠtyrjoch a Wólbernosće. Wunošk wječora je na dobro Towarstwa Cyrila a Metoda z.t. postajeny. Te chce pjenjezy za projekt wutworjenje parka blisko swjatnicy w Róžeńće nałožić.

## Modlenje w Róžeńće w šěsć rěčach

Na mjezynarodne modlenje swjateho róžowca a před Najswjećišim su wěriwi sobotu, 7. decembra, we 18.00 hodź. do Róžeńčanskeje hnadowneje cyrkwy přeprošeni. Pačerje budu serbsce, němsce, pólsce, česce, chorwatsce a rumunsce spěwane.

## **Kreativna džěłarnička**

Dekanatne dušepastyrstwo za džěci přeprošuje šulerki a šulerjow 6. do 8. lětnika do Don Boskoweho domu we Worklecach na kreatiwnu džěłarničku, kotraž budže sobotu 14. decembra. Wobdžělic móža so pak dopołdnja wot 9.00 do 12.00 hodž. abo popołdnju wot 13.00 do 15.00 hodž. Přizjewjenja přijimuju online hač do pónđzele, 9. decembra. Ličba městnow je wobmjezowana. Swójski přinošk wučinja pjeć eurow na wobdžělnika.

## **Kubłanski dzeń młodych dorosćenych**

Dekanatne dušepastyrstwo za młodžinu přeprošuje młodych dorosćenych na kubłanski dzeń z kapłanom Florianom Mrózom. Tón budže njedželu, 29. decembra, wot 10.00 do 18.00 hodž. Přizjewjenje dekanatne dušepastyrstwo online hač do njedzele, 8. decembra. Link je pod [www.posol.de](http://www.posol.de) podaty.

## **13. kulturna zyma w Chróscicach**

We wobłuku 13. kulturneje zymy w putniskej hospodže Moniki Gerdesoweje w Chróscicach přednošuje Beno Bělk sobotu, 7. decembra, w 19.45 hodž. pod hesłom „Saudi-Arabska, žony ...“. Hižo w 16.00 hodž. poskičuje hosćicelka serbske džěćace kino. Wšitcy zajimcy su wutrobnje přeprošeni.

## **Na literarnu kofejownju**

Zhromadnje z Budyskej wokresnej ludowej uniwersitu zarjaduje Budyski Ekumeniski tachantski wobchod 80. literarnu kofejownju. Wona budže pjatk, 6. decembra, we 18.30 hodž. w rumnosćach foruma šule, Wulka Bratrowska hasa 6 (něhdyša kofejownja „Goliath“). Z čitanjom z knihi „Interview mit dem Weihnachtsmann“ spominaja na 125. narodniny a 50. posmjertniny spisowaćela Ericha Kästnera. Wšitcy zajimcy su wutrobnje přeprošeni.

## **Adwentne wiki w klóštrje**

Na adwentne wiki su wopytowarjo sobotu, 14. decembra, wot 10.00 do 18.00 hodž. do klóštra Marijineje hwězdy prošeni. Mjez druhim poskića hodowne štomy, Ochranowske hwězdy a swójske wudžěłki kaž wšelake likery, sele a wolije, kotrež klóšterske sotry same zhotowjeja.

## **Zwukowa instalacija znowa přistupna**

Spirituelnu zwukowu instalaciju wo psalmje 23 móža wopytowarjo po lěće 2021 znowa w Rakečanskej ewangelskej cyrkwi dožiwić. Wona je hač do njedzele, 2. februara, přistupna. Psalm wo dobrym pastyrju předstajeja w modernym wobdžěłanju a ze swětłowymi efektami. Wopytowarjo smědža so, na hudźbu słuchoju, po cyrkwi pohibować. Boži dom je wšědnje wot 9.00 do 20.00 hodž. přistupny.

## **Koncert w klóštrje**

Drježdžanski komorny chór Ad libitum wuhotuje njedželu, 8. decembra, w 16.30 hodž. pod hesłom „Adwent“ hudźbny koncert w cyrkwi klóštra Marijineje hwězdy w Pančicach-Kukowje. Wšitcy su wutrobnje přeprošeni.

## **Wustajeńca w Baćonju**

Wustajeńca wo eucharistiskich džiwach, kotrež běše zbóžny Carlo Acutis zestajał, budže wot njedzele, 8. decembra, w Baćońskej cyrkwi stać. Dotal je wona w Njebjelčicach.

## **Adwentnej koncertaj w Smochćicach a Baćonju**

Drježdžanscy kapałnicy wuhotuja sobotu, 7. decembra, 19.30 hodź. adwentny koncert w cyrkwi swjateho Bena Smochčanskeho kubłanišća swjateho Bena. Lisćiki za wječor móža sej zajimcy online skazać. Link nańdu pod [www.posol.de](http://www.posol.de). We wobłuku koncerta wuwjaza biskop Heinrich Timmerevers tohorunja Sebastiana Kieslicha z jeho zastojnstwa jako rektora domu w Smochćicach. Hižo wot 18.00 hodź. poskićuja před cyrkwu horce wino a hodowne słódcizny.

Nazajtra druha adwentnu njedzelu, 8. decembra, koncertuja kapałnicy w Baćońskej cyrkwi Jězuseweje wutroby. Započatk je w 17.00 hodź.

## **Hodowna pakćikowa akcija**

Towarstwo swjateje Filomeny z.t. chce tež lětsa zaso džěci a swójby w maćerno-džěćacym domje w čěskim Dolním Podluží kaž tež w bołharskim Razgradze a wokolnych wsach z hodownymi pakćikami zwjeselić. Wobsah pakćikow njeje předpisany. Trjebanu drastu a črije lětsa njehromadza. Pakćiki kaž tež počehnjenja a twory higieny zběraja wot pónđzele do štwórtka, 2. do 5. decembra, wšědnje wot 17.00 do 18.00 hodź. w kulturnym domje w Smjerdžacej. Z pjenježnymi darami maja so přenjořadnje transportne kóšty narunać. Kwitowanku za pjenježne dary po přeću wustaja. Dalše informacije podawa Gerat Róbl w Smjerdžacej pod telefonowym čisłom (01 72) 7 94 75 22.

## **Mandźelskej seminaraj**

Seminaraj k přirotej na sakrament mandźelstwa wotmějetej so klětu stajnje pjatk a sobotu, 7. a 8. februara kaž tež 28. a 29. nowembra, w Smochčanskim kubłanišću swjateho Bena. Přizjewjenja přijimuje dekanatne dušepastyrstwo młodžiny we Worklecach hač do srjedy, 8. januara, online. Link je pod [www.posol.de](http://www.posol.de) podaty.

## **Wukubłanje JULEICA darmotny**

Worklečanske młodžinske dušepastyrstwo přewjedže klětu zaso za zajimcow kurs JULEICA. Wukubłanje wobsteji z dweju džělow a wotměje so stajnje wot pjatka do njedzele, 4. do 6. apryla, kaž tež wot 25. do 27. apryla, w Smochčanskim kubłanišću swjateho Bena, tam z přenocowanjom. Kompletne wukubłanje je darmotne. Zajimcy měli so nimo toho na kursu přenjeje pomocy wobdžělić. Tón budže sobotu, 15. měřca, we Worklečanskim Don Boskowym domje. Kaž dekanatene dušepastyrstwo zdžěli, je wón za wšěch wobdžělnikow zawjazowacy. Kurs přenjeje pomocy z druhich městnow njemóža wotnětka hižo přilićić. Přizjewjenja přijimuja online. Link je pod [www.posol.de](http://www.posol.de) podaty.

## **Serbski comic wo influenceru Božim**

Wo Carlu Acutisu (1991–2006), młodostnym z Italskeje, kiž móžeše jara derje z kompjuterami wobchadžeć a kotryž ma so klětu w aprylu swjatoprjajić, předleži comic tež w serbskej řeči. Publikacija je na wšitkich farach w katolskich Serbach za 15,00 eurow na předań. Po českej wersiji je ju farar Gerat Wornar přełožił a Fabian Kaulfürst lektorizował.